

Crist risurît al colme dute la sperance dal om

Fintremâi cumò, te liturgjie di cheste gnot, o vin vût l'anunzi che Gjesù Crist al è risurît pardabon dai muarts. E se al è pardabon resurît, cjapant une gnove vite, chest fat, fat de storie dal passât, al è ancje la fonde de nestre religjon. I apuestui a disevin: noaltris o crodìn parcè che o sin testimonis che Crist al è resurît dai muarts.

Il tornâ a ripeti simpri chest, al è un fat fundamentâl. Nô no crodìn par altris motifs che par chel che a disevin lôr: Crist al è risurît dai muarts e nô lu vin viodût, lu vin tocjât, lu vin sintût a fevelâ, o vin mangjât cun lui dopo che al è risussitât dai muarts.

Al semee che i apuestui a vedin capît che a vevin di doprâ ducj i sens che a vevin par dâsi verementri cont che si tratave propit di Crist, chel Crist che al veve vivût cun lôr. Chest il fat di fonde.

* * *

Ma nol baste. Nol è chest il significât intîr de fieste di usgnot. O fasìn masse fieste par che dome un om al sedi resurît intal cors de storie. Ce nus impuartial a nô che Crist al sedi resurît dai muarts? Ce nus impuartial che lui al vedi vinçude la muart? E chi e jentre la religjon. Parcè che cirî di rifleti, cirî di capî, di comprendi cuî cjâf dal om ce significât che al pues vê par nô che Crist al sedi risurît dai muarts, no je une robe che si puedi capîle. Si pues dome crodi che il fat che lui al sedi resurît, al vedi une impuartance par nô; che il fat de resurezion di Crist al sedi in cualchi maniere zontât cu la nestre vite e che, come che o murìn, o sarìn ancje bogns di risurî. Come che in Adam (tal prin om, al disarès sant Pauli) che al à pecjât o murìn, cussì in Crist, il prin resurît, intal non di lui, par vie de fede in lui, une altre dì ancje nô o tornarìn a resurî.

No je une robe di pôc. No si trate chi dome di crodi che al esist un Suprem, si trate di crodi che inte storie realmentri al sedi esistût un che al veve il podê, che al à vût il podê di fâ robis liberatoriis, di redenzie, no dome par so cont ma par ducj i oms, par ducj chei che a podevin, intune maniere o ta chê altre, crodi in lui. E usgnot, la liturgjie che o stin fasint e riclame chê robe chi. E riclame prin di dut il fat che Crist al è resurît. E alore, cun ce imagjin vevino di pontâlu se no cun chê di impiâ la lûs gnove? Cheste e je la prime part de liturgjie.

La seconde robe e sarà chê da la aghe. La imagjin da la aghe e duncje dal somerzisi ta la aghe midiant dal batisim, come par dî di intensivâsi in Lui. Une frase di sant Pauli e dîs: ducj voaltris che o sês stâts batiâts in Crist Gjesù (savint che la peraule "batiâ" e vûl dî propit somerzi), o sês stâts come sapulîts te sô muart, e o tornarês a nassi de muart, a resurî de muart esatementri come che lui al è risurît de sô muart. Chesj i significâts di fonde de cerimonie liturgjiche che o vin fate e che o fasarìn. La lûs e la aghe; ven a stâi la identificazion cun Crist. Ce che al è sucedût a Lui, nus sucedarà ancje a nô. Cheste robe culî no si pues dimostrâ cun arguments. Si pues dome crodile. E su ce crodîno? O crodìn su la peraule di Crist che nus à dade la sigurece propit vincint e risurint dai muarts.

Une tierce idee, inte liturgjie di usgnot, e je une vore impuartante. Nô o vin cirût di lei cualchi toc de Bibie. Si podeve leint cualchidun di plui; si podeve leint cualchidun di

mancul; cualchidun di chei tocs de Sacre Scriture o de Storie Sacre, come che o disès voaltris. Propit Storie Sacre, intal sens che no je dome storie, cognossi i fats, ma propit la sacralitât de storie. Nol è che nô o vedin voie di capî dome ce che al è sucedût al popul ebraic o ai nestrìs vons. O cirìn di capî il significât di chê robe li, o ce che al è devant dai voi di Diu. Par chel o disìn "Storie Sacre". Nol è dome impuartant ce che o vês sintût a lei, ma il significât che ce che o vês sintût, un lei che al à devant dai voi di Diu.

Par prin la creazion: ce maniere che nus e contin, cu lis ideis primitivis dai ebreus di in chê volte. Nol è di fermâsi a chel concet alì, ma al significât di fonde, ae sacralitât di ce che si conte. In fonts, nus à dit che il mont al à un principi di une volontât divine, di un che al à volût che nô o fossin, liberementri. Che ce che al sucèt in chest mont, in fonts, e je providence di Diu, che nô no sin nemâi cualunche. Nô, oms, no sin fra i nemâi un dai tancj; no sin il miôr nemâl. Ma o sin fats sul stamp di Diu. Par ce motîf? Par une robe che nol è tant facil comprendi e rifleti personalmentri cu la filosofie, come che a disìn i oms. No. Al è un fat di religjon, di crodi.

O crodìn che l'om nol è dome nemâl, nol è dome bon, nol è dome une des bestiis plui interessantis su la face de tiere e inte storie limitade dal nestri orizont. Al è alc che verementri nus riclame, nus riflet come tun spieli la lûs di Diu e al merte tratât come che al merte tratât. Voaltris lu savês che chel teme achì al è il teme di dut il pontificât dal pape di cumò: la grande dignitât dal om che in fonts al è sul stamp di Diu, e che ce che si fâs al om, la maniere che si trate l'om e je la misure di ce che nô o podìn crodi, o podìn pensâ di Diu stes.

O disevin che o vin letis chês robis li par cirî di capî la sacrilitât de storie. E alore, ce vuelial dî il passaç dal mâr Ros? Pai ebreus, al vûl dî la liberazion politiche de dominazion dai egjizians. Par nô, ce vuelial dî? Al à un significât une vore plui profund. Che al seti stât un grant aiar che al à soflât dute la gnot, come che o vin sintût tal toc let cumò devant, che al à parât di bande la aghe, che al seti stât chel o un altri, il grant fat al è chest: che Diu al voleve manifestânus in cualchi maniere che al veve di liberânus. No di deliberânus di une robe politiche; no di deliberânus di alc che al podeve tocjânus economichementri o socialmentri, come che a disìn cumò. Crist al voleve fânus libars, salvânus. Ma di ce? Dai vêts mâi!

No podìn migo dî che il nestri vêt mâl al puedi jessi il taramot che al è stât cualchi an indaûr! No podìn dî che il grant mâl al pues jessi il fat che i afârs a puedin lânus mâl, che nus pues capitâ une malatie o la muart.

Nol è chest, il vêt mâl. Il vêt mâl, viodût inte storie seont la Storie Sacre, seont il pont di viste di Diu, al è un altri. E la Storie Sacre e voleve insegnânus chest: di cirî di viodi a fonts, inte storie dai umigns e duncje inte nestre storie, là che al è pardabon il mâl, e là che al è pardabon il ben.

Se Crist al veve di salvânus di chestis robis di fonde, al veve di salvânus dal mâl che nus cjape, dai accidents che a puedin ocorinus, des malatiis che a puedin tocjânus te vite. Intune peraule: de muart che nus pues tocjâ te vite. E Crist nus salve di chês robis chi. O sin ca par dî che o sperìn in chest. Che Crist che al è resurît de muart, lui che al à patide une muart e une muart di crôs, Crist al sarâ chel che par prin nus mostrarà la strade di tornâ a cjatâ la vite. E si trate no dome di tornâ a cjatâ une vite come chê che o vin, ma une

vite su la someance di chê di Crist, che dopo muart al veve la seconde.

E voaltris lu viodês intal vanzeli che Crist si presente inte seconde vite jentrant tal cenacul a puartis sieradis; e pûr realmentri lui, cu la intensitât dal propri cuarp e des propriis feridis, di ce che al veve patît, fasîntsi ricognossi dai siei dissepui. Ma in forme gloriose, trionfant. Crodi a chê robe chi al vûl dî vê une sperance enorme. Crodi che si pues sperâ di jessi bogns di superâ i contrascj che a puedin capitâ inte vite parcè che, par grancj che a setin, no son mai il mâl assolût; par disgraciis che nus capitin, no son mai il mâl semplicementri. Crist no nus puarte une salvece che e puedi jessi dome sociâl, politiche, culturâl. No, nus salve in maniere complete e totâl. Ce che nô furlans o clamìn redenzie.

Nus delibere, dal font dal nestri jessi, di cualunche reson di mâl, di cualunche tristerie. Propit par chest e je la sô vitorie su la muart che e finîs cul jessi ancje la nestre vitorie su la muart. Par chel o fasìn fieste vuê, par chel o vin cirût di cjantâ cjants di gjonde, par chel la Glesie no cesse di celebrâ cheste gnot sante e i popui cristians te storie le àn clamade "nox magna", la grande gnot. Esatementri parcè che e je la gnot che nus ricuarde la nestre sperance. L'om, di front di Crist, come crodint, al è un che al crôt in lui, no dome in cualchi miserabile sperance di chest mont. Ce volêso fâ? Sperait voaltris intun stât che us protezi. Sul plui biel, us mole. Sperait voaltris in cualchi organizazion, in cualchi associazion, in chel o in chel altri. Sul plui biel, us lasse. O vin bisugne di vê une sperance in alc che nol mole, che no nus lasse, che al è bon di vênus talmentri a cûr che nus seguîs ancje cuant che o mertin dome misericordie e perdon, cuant che e semee disperade. Chest al è il significât de Pasche.

Pasche pai ebreus e voleve dî il passaç. "O vin passât il Mâr Ros", a disevin. Nô o vin passât il Mâr Ros sperant esatementri ancjemò. No sin chei che a àn la salvece in man. O sin chei che le sperin e le sperin intune maniere sigure come che al jere sigûr il vecjo Mosè cuant che al vierzeve la aghe dal Mâr Ros par fâ scjampâ la sô int. Chescj, i significâts des leturis.

Però mi vignarès voie di dî alc altri, di vîf e di concret. O volarès dîus chest. Confondi la religjon dome cun cualchi sperance di chest mont, cul ben de patrie, cul ben di chest, cul ben di chel altri, al è masse poc. Crist al è alc di plui, alc di plui profund. E je une robe cheste di Crist, che no sta intal nestri cjâf e no sta inte nestre vite. Al è alc di plui profund. Nô o crodìn in lui, si fidìn, parcè che al merte che si fidìn. E che si fidìn di lui ancje par jemplâ in cualchi maniere il vœit de nestre vite e la sperance che o vin di no jessi considerâts e di no jessi di fat dome miserabii nemâi che vuê a son e doman no son, cence nissun significât e cence nissun parcè. Nô o vin un grant parcè, e o sperìn in Crist. Nol è che nô o sperìn che une robe cussì e pues capitânus parcè che nus plâs, ma parcè che di fat Crist al è pardabon risurît.

E cun chest us doi la Buine Pasche, a voaltris e ancje a mi. Crist al è risurît pardabon. E se al è risurît pardabon, nol è resurît dome par se ma ancje par nô, e la testimoniance di chest e je la pratiche dal batisim che nô o vin ricevût al inizi de vite. Somerzisi ta la aghe come che in Crist si somerzìn e o partecipìn de sô vite, de sô muart e de sô resurezion.

*Plêf di Guart,
vee di Pasche dal 1981*

